

宋 葉隆礼 著

契丹國志

宋

葉隆禮撰

（國學文庫第三編）

契丹國志

全

中華民國二十二年九月重印

契丹國志二十七卷宋祕書丞葉隆禮奉勅撰隆禮以南人而紀北事囿於見聞尙多闕略然其叙次筆法有良史才原夫遼之立國四京分建控制諸蕃何其強也乃太祖太宗之雄略開基聖宗興宗道宗之輯民保境一荒淫之天祚敗之而無餘敘述之際垂鑒深矣至於宋遼之交尤多微意若澠淵誓書關南誓書地界之議禮物之數皆詳載無遺蓋宋徽宗之約金攻遼釁起於趙良嗣禍成於童貫蔡攸權其曲直

責有所歸隆禮不敢顯言之故備陳舊典以戒前車所謂據事直書而其義自見蓋亦史氏之法也此書近有坊刻頗多

訛戾之處

世臣

以

中祕本校正之視坊本爲完善云南沙席臣世識

臣等謹案契丹國志二十七卷宋葉隆禮撰隆禮號漁林嘉興人淳祐七年進士由建康府通判歷官祕書丞奉詔撰次遼事爲此書凡帝紀十二卷列傳七卷晉降表宋遼誓書議書一卷南北朝及諸國饋貢禮物數一卷雜載地理及典章制度二卷行程錄及諸雜記四卷錢曾讀書敏求記稱其書法謹嚴筆力詳贍有良史風而蘇天爵三史質疑則謂隆禮不及見國史其說多得於傳聞譏其失實甚多今觀其書大抵取前人紀載原文分條採摘排比成編穆宗以前紀傳則本之資治通鑑穆宗以後紀傳及諸雜記則本之李燾長編等書其胡嶠陷北記則本之歐陽修五代史記四夷附錄諸番記及達錫伊都等傳則本之洪皓松漠記聞雜記則本之武圭燕北雜記

案圭書今不傳其言略見曾慥類說

皆全襲其

詞無所更改閒有節錄亦多失當如通鑑載太祖始立爲王事上云恃
疆不受代故下云七部求如約今此書刪去不受代之文則所謂如約
者果何事乎又長編載聖宗南侵事云天雄軍聞契丹至闔城惶遽契
丹潛師城南設伏狄相廟遂南攻德清王欽若遣將追擊伏起天雄兵
不能進退其情事甚明今此書於闔城惶遽下卽接伏起云云而盡刪
其潛師設伏之文則所伏者果誰之兵乎又松漠記聞載黃頭女真金
人每當出戰皆令前驅蓋洪皓所親見其爲金人事甚明今此書乃徑
改金人爲契丹採入遼志則益爲顛倒事實矣又帝紀中凡日食星變
諸事皆取長編所記按年臚載然遼宋曆法不齊朔閏往往互異如聖
宗開泰九年遼二月置閏宋十二月置閏宋之七月在遼當爲八月而

此書仍依宋法書七月朔日食此類亦俱失考蓋隆禮生南渡後距遼
亾已久北土載籍江左亦罕流傳僅據宋人所修史傳及諸說部抄撮
而成故本末不能悉具蘇天爵所論深中其失錢曾蓋未詳核也特諸
家日錄所載若遼庭須知使遼圖抄遼遺事契丹疆宇圖契丹事迹諸
書隆禮時尙未盡佚故所錄亦頗有可據如道宗壽隆紀年此書實作
壽昌與遼世所遺碑刻之文竝合可以證遼史之誤又天祚紀所載與
金攻戰及兵馬漁獵諸事較遼史紀志爲詳存之亦可備參考惟其體
例參差書法顛舛忽而內宋則或稱遼帝或稱國主忽而內遼則以宋
帝年號分註遼帝年號之下旣自相矛盾至楊勳劫父叛君蔑倫傷教
而取胡安國之謬說以爲變不失正尤爲無所別裁又書爲奉宋孝宗

勅所撰而所引安國說乃稱安國之謚於君前臣名之義亦復有乖今竝仰遵

聖訓改正其訛用以昭千古之大公垂史冊之定論焉

乾隆

年 月恭校上

進契丹國志表

臣隆禮上言伏惟契丹立國強盛逾貳百年祕苑修書鑑誠垂億千代不量愚瞽冒瀆淵聰臣誠惶誠懼稽首頓首恭惟皇帝陛下天挺英奇神資睿聖縱觀前史紆覽宏圖印五帝三王之心有意建極陋三國六朝之事奚取亂華然道判汗隆載存嫩惡中朝不競漢北方勇於爭衡五閏紛拏氍廬遂安於徙宅載觀大遼之紀號其誰小朝以自厝八際洪流頓起興亡之慨九州重霧忍無裔夏之嗟其契丹國自阿保機初興迄于天祚之亡立統承家凡二百餘載臣奉勅命謹採摭遺聞刪繁剔冗緝爲契丹國志以進淺短自慙筆削莫措尊王而黜霸庶幾有補

於將來外陰而內陽益空永鑑於既往所有契丹國志隨表繕進以聞
臣誠惶誠懼稽首頓首百拜昧死謹言

淳熙七年三月

日祕書丞臣葉隆禮上表

契丹國初興本末

契丹之始也中國簡典所不載遠裔草昧復無書可攷其年代不可得而詳也本其風物地有二水曰北也里沒里復名陶猥思沒里者是一也其源出自中京西馬孟山東北流華言所謂土河是也曰裊羅箇沒里復名女古沒里者又其一也源出饒州西南平地松林直東流華言所謂潢河是也至木葉山合流爲一。古昔相傳有男子乘白馬浮土河而下復有一婦人乘小車駕灰色之牛浮潢河而下遇於木葉之山顧合流之水與爲夫婦此其始祖也是生八子各居分地號八部落一曰祖〇一作祖皆利部二曰一室活部三曰實活部四曰納尾部五曰類

沒部六曰內會鷄部七曰集解部八曰奚嗛部立遺像

始祖及八子

于木葉

山後人祭之必刑白馬殺灰牛用其始來之物也後有一主號曰迺呵

此主特一髑髏在穹廬中覆之以氈人不得見國有大事則殺白馬灰

牛以祭始變人形出視事已卽入穹廬復爲髑髏因國人竊視之失其

所在復有一主號曰喝

○一作喝

呵戴野猪頭披猪皮居穹廬中有事則出

退復隱入穹廬如故後因其妻竊其猪皮遂失其夫莫知所如次復一

主號曰晝里昏呵惟養羊二十口日食十九畱其一焉次日復有二十

口日如之是三主者皆有治國之能名餘無足稱焉異矣哉氈中枯骨

化形治事戴猪服豕罔測所終當其隱入穹廬之時不知其孰爲之主

也孰爲之副貳也荒唐怪誕訛以傳訛遂爲口實其詳亦不可得而詰

也自時厥後牛馬死損詞訟靡淹復遭風雨雪霜之害中遂衰微八部
大人後稍整兵三年一會於各部內選雄勇有謀略者立之爲主舊主
退位例以爲常至阿保機爲衆所立後併七部而滅之契丹始大原其
立國興自阿保機至耶律德光而寢張遭五季之衰天未厭亂石郎胎
釁產禍諸華毒痛四海飛揚跋扈貪殘僭擬中國帝王名數盡盜有之
冠屨倒植薰蕕共染干戈之慘極矣迨宋眞宗屈己和戎不復以一矢
相加遺含容覆護百有餘年聖興道三主聖宗道宗興宗以來天誘其衷革心
慕義貪婪歲幣顧惜盟好銷烽寢柝號稱無事南北民不知兵各保首
領以沒茲非以德懷遠之明效歟嗟夫宋列聖之兼愛其德可謂至哉
若遼之威服諸夷奄有全燕何其強也天祚昏孱女眞生心深入一呼

土崩瓦裂何其弱也且佳兵者不祥之器也天道好還盛極而微理固然也故其興也勃焉其亾也忽焉悲夫今撫舊聞裒其本末雖未能考其異而訂其同要之大略甚不相遠後之英主忠臣志士游今涇古可以鑑矣

契丹國初興本末終

契丹國九主年譜

太祖大聖皇帝

諱億番名阿保機

梁均王貞明二年丙子稱帝國號大契丹改

元神冊辛巳改元天贊至丙戌天贊六年

後唐明宗天成元年

秋七月崩在位

十一年

太宗嗣聖皇帝

諱德光元名耀屈之太祖第二子

丙戌歲卽位丁亥改元天顯丁酉改

元會同國號改大遼丁未會同十一年

北漢高祖天福元年

夏四月崩在位二

十二年

世宗天授皇帝

諱阮番名兀欲太子孫東丹王突欲之子

丁未歲卽位戊申改元天祿

北漢

歷帝乾祐元年

辛亥天祿四年

後周太祖廣順元年

秋九月爲燕王述軋等弑

新州火神淀在位五年

穆宗天順皇帝

諱景番名述律太宗長子

辛亥歲卽位改元應祿至戊辰應祿十八

年

宋太祖開寶元年

秋九月爲庖人弑于黑山下在位一十八年

景宗孝成皇帝

諱明記更名賢世宗之子

戊辰歲卽位改元保寧甲戌改元乾亨至

壬午乾亨九年

宋太宗太平興國七年

十二月崩在位十五年

聖宗天輔皇帝

諱隆緒景宗之長子

癸未歲卽位改元統和

宋太平興國八年

癸丑統和

三十一年改元開泰復改國號大契丹壬戌改元太平辛未太平十

年

宋仁宗天聖九年

六月崩於上京在位四十九年

興宗文成皇帝

諱宗真番名木不孤聖宗第八子

辛未歲卽位壬申改元景福

宋仁宗明道改

元

癸酉改元重熙至乙未重熙二十三年

宋仁宗至和二年

八月崩在位二

十五年

道宗天福皇帝

諱洪基興宗之子

乙未改元清寧乙巳改元咸雍丙午咸雍二

年復改國號大遼乙亥改元壽昌至庚辰壽昌六年

宋哲宗元符三年

崩在

位四十六年

天祚皇帝

諱延禧道宗之孫秦王元吉之子

辛巳歲卽位改元乾統

宋徽宗建中靖國元年

辛卯

改元天慶戊辰天慶八年

宋徽宗政和八年金太祖天輔元年

辛丑改元保大至甲辰

保大四年

宋徽宗宣和六年金太宗天會二年

金太宗舉兵攻遼天祚逃竄夾山金國

擒之削封爲海濱王送長白山東築城居之踰年乙巳而卒遼國遂

亾在位二十四年

契丹自太祖神冊丙子稱帝至天祚保大甲辰計九主在位首末